

puis qu'il le veut estre: mais il fera seul de sa bande, car personne n'a envie de le fuire: c'est quelque vain espoir qui le pousse, dont nous ne faisons point d'estat, on m'a baptisé lors que j'estois malade à la mort, si tost que l'esprit m'est reuenu, j'ay defauioué tout ce que j'auois dit pour lors. Nostre Catechumene entendant ce discours, s'anime dauantage, il va trouuer le Pere Buteux, luy raconte tout ce qui s'estoit passé: Allons, luy dit-il, à la Chappelle, ie veux faire vn autre cry public contre l'impudence de cet Apostat: mais deuant que l'entreprendre, ie veux recommander l'affaire à nostre Seigneur, ayant fait sa priere, il s'en va vers les cabanes, éleue sa voix, crie avec vn zele de feu: Je vous ay desia dit plusieurs fois, que ie voulois estre baptisé, ie perseuere dans ma resolution; si quelqu'un a quelque chose à dire contre moy, qu'il se haste; car c'est demain que ie le dois estre: Je le deuois estre aujourd'huy, mais pource que la ieunesse est absente, j'attens son retour, afin qu'elle apprenne par mon exemple, à ne point redouter les langues médifantes, [126] quand il s'agit d'une si sainte action.

Le lendemain il se vint presenter au saint Baptême, deuant que de le receuoir il tint ce discours à ceux qui estoient presens: Escoutés ieunesse, peut-estre que quand vous me voies à la porte de cette Eglise, vous dites dans vos cœurs; voila qui va bien, Piefkars va estre amy des François, il nous fera fauorable, il ne manquera pas de belles robes, il aura des viures en abondance, voila peut-estre vos pensées; mais vous vous abusés, sçachés que Piefkars ne se fait pas Chrestien pour aucune consideration humaine, c'est pour éuiter les feux de l'autre vie, c'est pour